

Script of Evening Gojri News Bulletin 26 November 2025 at 1700 Hrs

ایونینگ گو جری نیوز بلیٹن مو رخہ 26 نومبر 2025

یوہ آکا شوانی جموں ہے محمد اکرم چودھری تے عبدالرحمان تیں خبر سُنو۔ پہلاں خاص خاص خبر۔

*1. لیفٹنٹ گورنر منوج سنہا نے جموں مانہ یومِ آئن تقریب غی قیادت کی نالے شہریاں نانہہ آئنی اقدار برقرار رکھن غی اپیل کی۔

*2. وزیر اعلیٰ عمر عبداللہ نے سب واسطے مساوی تے جامع تعلیم غو مطالبو کیو ، نالے تعلیم نانہہ مذہبی تعصب تیں پاک رہن ور زور دتو۔

*3. 5 سال غا وقفہ تیں بعد چار ممبران پا رلیمان راجیہ سبھا مانہہ جموں کشمیر غی نمائندگی کریں گا، انب صدر جمہو ریہ پہلی دسمبر نانہہ ان ممبران نانہہ حلف دوائیں گا۔

*4. چیف سیکریٹری نے پی ایم گتی شکتی پورٹل ور یوٹی غا پہلا ڈیجیٹل زمین بارے بئنک غو آغاز کیو۔

*5. تے جموں کشمیر مانہہ سخت ٹھنڈ پے رہی ہے تے درجہ حرارت مانہہ مزید گراوٹ آ رہی ہے ، نالے تہند غی وی پیشنگونی کی گئی ہے ۔

خبراں غی تفصیل نال پہلاں عبدالرحمان شاہین۔

LG Constitution Day

لیفٹنٹ گورنر منوج سنہا نے آج جموں مانہہ یومِ آئن غی تقریب مانہہ شرکت کی، تے بھارت غا آئن غا بائیاں تے معماران نانہہ خراج عقیدت پیش کیو۔ اُنہاں نے کہیو جے آئن پچھلا 70 بہراں تیں ہر شہری واسطے مساوات، آزادی تے سماجی انصاف غی رہنمائی کرن آلی روشنی بنیو وہ ہے ۔ اس موقع ور لوکاں غا اجتماع سنگ خطاب کرتاں واں لیفٹنٹ گورنر نے کہیو جے سال 1949 نانہہ آج ہی غے دن بھارت نے دوجاں غا لکھیا وا آئن نانہہ اپنان غے بجا ئے اپنو مقدس آئن اختیار کیو۔ اُنہاں نے زور دے غے کہیو جے تمام شہریاں نانہہ چاہیے جے وے اپنو ہر عمل آئنی دائرہ مانہہ رہ غے اپنا ویں، اس موقع ور بولتاں واں اُنہاں نے مزید اس طرح کہیو۔ بانٹ۔ اسے دوران جموں غا بکھ بکھ علاقان مانہہ سمویدھان دیوس نانہہ مناتاں واں بہت ساری تقریبات منعقد کی گئیں۔ جن مانہہ حلف برداری غی تقریبات، تمہید یا دیباچہ نانہہ پڑھنو تے ایکتا بارے دوڑ جیسا پروگرام شامل تھا ۔ اس بارے پیش ہے اک رپورٹ۔ بانٹ۔

CM Poonch

وزیر اعلیٰ عمر عبداللہ نے آج اس گل ور زور دتو ہے جے تعلیم نانہ مذہبی تعصب تیں پاک تے سب واسطے شمولیت ور مبنی ہونو چاہیے۔ انہاں نے اس گل غو حوالو دتو، جے آن بند سب واسطے مساوی حقوق غی ضمانت دے۔ انہاں نے ان گلاں غو اظہار پونچھ مانہ تعلیمی گروپ ضیائ العلوم غی 50 ویں سالانہ تقریب سنگ خطاب کرتاں واں کیو۔ انہاں نے سیکولر تے مساوی تعلیم غی اہمیت نانہ اُجاگر کیو۔ وزیر اعلیٰ نے تعلیمی اداراں ور زور دتو جے وے بغیر کسے فرقو فرقی غے تمام طلبائ نانہ مواقع فراہم کریں۔ انہاں نے اس گل ور زور دتو کہ ایسو نقطہ نظر مساوات تے سماجی آہنگی نانہ فروغ دے، نوجواناں نانہ با اختیار بناوے تے یقینی بناوے کہ تعلیم اک منصفانہ تے ترقی پسند معاشرہ غی بنیا د غے طور ور کم کرے۔ اس موقع ور بولتاں واں وزیر اعلیٰ نے اس طرح کہیو۔۔ با نٹ۔

LG 26/11

لیفٹنٹ گورنر منوج سنہا نے 11/26 غا ممبئی دہشت گردانہ حملہ مانہ جان گنوان آلاں نانہ خراج عقیدت پیش کیو ہے۔ اک سماجی میڈیا پوسٹ مانہ جناب سنہا نے کہیو کہ قوم ہمیشہ ان بہادر حفاظتی اہلکاراں غی شکر گزار رہ گی، جنہاں نے بہادری سنگ لڑ غے ملک غی خود مختاری تے سالمیت واسطے عظیم قربانی دتیں۔ لیفٹنٹ گورنر نے ان غی ہمت تے بے لوثی ناں یاد کرتاں واں اس گل ور زور دتو کہ ان غی میراث بہادری تے جزیو نسلان نانہ متاثر کرے، تے دہشت گردی غے خلاف قوم غا عزم نانہ باہدو دے۔

RS Oath NC

جموں کشمیر تیں نواں منتخب ہوا نیشنل کانفرنس غا 3 ممبران پارلیمنٹ پہلی دسمبر نانہ راجیہ سبھا مانہ حلف لیں گا۔ جھیڑی سرمائی اجلاس غا پہلا دن غی کاروائی وے گی۔ شمی اُبرائے، سجاد احمد کچلو تے چودھری محمد رمضان نانہ نائب صدر جمہوریہ و چیرمین سی پی رادھا کرشنن حلف دواں گا۔ ان غا چنانو سنگ تقریباً 5 بہراں تیں بعد جموں کشمیر غی ایوان بالا مانہ نمائندگی بحال ہو رہی ہے۔ واضع رہ جے یہ انتخابات 4 سیٹاں واسطے منعقد ہوا تھا، جن وچوں نیشنل کانفرنس نے 3 سیٹ جتیں جدکہ بھارتیہ جنتا پارٹی نے اک نشست حاصل کی۔ بی جے پی غا امیدوار ست شرما پہلاں ہی حلف لے چکا ہیں۔

مزید خبراں نال محمد اکرم چودھری۔ ور اُس تیں پہلاں یوہ پیغام۔ (یہ خبر تم آکاشوائی جموں تیں سن رہیا ہیں، تے یہ خبر مہاری ویب سائٹ نیوز آن انیر ڈاٹ گوو ڈاٹ ان ور وی دستیاب ہیں، اس تیں یہ خبر مہاری موبائل ایپ تے ڈی ٹی ایچ وروی دستیاب ہیں)

CS Digital Land Bank

چیف سیکریٹری اٹل ڈلو نے پی ایم گتی شکتی پورٹل ور مرکز غے زیر انتظام علاقہ غا پہلا زمینی ریکارڈ بارے بینک غو آغاز کرایو ہے۔ اس قدم غے تحت ریاستی اراضی غا قطعاعات یعنی سرکاری زمین غا بکھ بکھ پلاٹاں نانہ جنگلات تے مال محکمہ غی طرفوں ایسی زمین غے طور ور نشان زد کیو گیو ہے، جھیڑو تمام رکاوٹاں تیں

پاک وے، یعنی جس ور کوئی قانونی تنازعو، نجی دعوو یاہ کوئی دوجی رُکاوٹ موجود نہ وے، تا نجے ترقیاتی پروجیکٹاں واسطے درست نشاندہی نانہ ممکن بنایو جا سکے۔ 17 ضلعان مانہ پھلیا واہ 4 سو 62 پلاٹ جن غو مجموعی رقبو 2 ہزار 4 سو ہیکٹر تیں زیادہ ہے ور مشتمل یوہ زمینی ریکارڈ بارے لینڈ بک بنیا دی ڈھانچہ غی منصوبہ بندی نانہ آسان بنان تے تجا وازات نانہ روکن غو ہدف رکھے۔ چیف سیکریٹری اٹل ڈلو نے ضلع انتظامیہ ور زور دتو جے وے ان پلاٹاں غی باقاعدہ نگرانی کریں تے اس پلیٹ فارم غا موثر استعمال نانہ یقینی بناویں۔ اس افتتاحی تقریب مانہ سینئر افسران نے شرکت کی، جد کہ ڈپٹی کمشنرز نے ویڈیو کانفرسنگ غے ذریعے حصو لیو۔

JK Govt Awards

جموں کشمیر حکومت نے سال 2026 واسطے جموں کشمیر حکومتی اعزازات واسطے نامزدگیاں غی دعوت دتی ہے۔ یہ اعزاز یوم جمہوریہ غی تقریب غا موقع ور پیش کیا جائیں گا۔ محکمہ عام انتظامیہ غی طرفوں جاری نوٹیفکیشن غے مطابق یہ انعام بہا در، ادب، فنون لطیفہ، ہنر و دستکاری، سماجی اصلاحات، عوامی خدمات، زندگی غی حصولیابی، کھیڈاں، ذرائع ابلاغ، ماحولیات تے صنعتی کاروباری شعبان مانہ نمایاں کارکردگی نانہ سراہن واسطے دتا جائیں گا۔ یہ نامزدگیں سماجی تے کھیڈاں غی تنظیمان، غیر سرکاری تنظیمان، یونیورسٹیاں، فن وثقافت تے زبانان بارے جموں کشمیر اکیڈمی تے انتظامی سیکریٹریاں تیں طلب کی گئی ہیں۔ نامزدگیں جمع کروان غی آخری تاریخ 15 دسمبر 2025 ہے۔

Aadhar Update

بھارتیہ مخصوص شناختی اتھارٹی نے سمگرا شکشا ڈائریکٹوریٹ غے سنگ شراکت مانہ رام بن ضلع مانہ اسکول غا بچان واسطے بڑا پیمانہ ور آدھار بایو میٹرک تا تاریخ مہم شروع کی ہے۔ صفر تیں 5 بہراں تے 5 سال تیں 17 بہراں غی عمر غا بچان واسطے لازمی بایو میٹرک تازہ ترین نانہ فعال کرن واسطے سرکاری تے نجی اسکولان مانہ کیمپ منعقد کیا جا رہیا ہیں۔ عہدیداران غو کہنو ہے جے یوہ قدم والدین تے اسکول غا عملہ غے بشکار آدھار جدید ترین غی بروقت اہمیت غا بارہ مانہ بیداری پیدا کرن مانہ مدد کرے۔ تا تاریخ شدہ آدھار غی تفصیلات حکومتی فوائد و وظائف تے مقابلہ جاتی امتحانات واسطے اہلیت حاصل کرن غی خاطر ضروری ہیں۔ مزید جانکاری سنگ مہار سنگ جڑ رہیا ہیں تعلیم تے تربیت بارے ضلعی ادارہ یعنی ڈائٹ رام بن تیں شاہنواز گئی... بانٹ۔

Farmers Reasi

ضلع ریاسی غا کسان قدرتی کاشتکاری غا قومی مشن غے تحت قابل ذکر مالی فائدہ غی گواہی دے رہیا ہیں، جہیزو کہ کریشی وگیان کیندر ریاسی غا لگاتار تربیت غے ذریعے یوہ تعاون حاصل ہے۔ کیمیائی کھاد تیں پاک تے ماحول دوست طریقان نانہ استعمال کرتاں واں وے اعلیٰ معیار غی نامیاتی سبزیاں نانہ تیار کر رہیا ہیں، جس غی بازار مانہ بڑی مانگ ہے۔ ضلع غا پونی علاقہ تیں تعلق رکھن آلا کسان کرشن سنگھ غی کامیابی غی اک خاص کہانی ہے، جہیزو روزانہ 70 تیں 80 کلو کیڑے مار دوائی تیں پاک سبزی غی کٹائی کرے تے سالانہ لکھان مانہ کمائی کرے۔ آکاشوانی غا

خبران آلا شعبه سنگ اپنی کہانی سانجھا کرتاں واں کسان کرشن سنگھ نے اس طرح کہیو۔۔ ہائٹ۔۔

Weather update

جموں کشمیر مانہہ شدید سردی پینو شروع ہو گئی ہے ، کیونجے کئی اضلاع مانہہ کہٹ و کہٹ درجہ حرارت مانہہ گروٹ آئی ہے ، کئی علاقان مانہہ موسم غی ٹھنڈی رات درج کی گئی ہے۔ آکاشوانی جموں غا نامہ نگار غی رپورٹ غے مطابق جموں شہر مانہہ 8 عشاریہ 8 ڈگری ، بانہال مانہہ منفی 0.7 ڈگری ، بھدرواہ مانہہ 0.5 ڈگری سلیس درجہ حرارت درج کیو گیو ہے ۔ موسمیاتی مرکز سرینگر نے اک ایڈوائزری جاری کی ہے ، جس مانہہ خطہ کشمیر تے خطہ جموں غا الگ تھلگ علاقان گا کئی مقامات ور ہلکی تیں درمیانی دھند غی پیشنگوئی کی ہے ۔ آن آلا 7 تیہاڑا غے دوران کہٹ و کہٹ درجہ حرارت مانہہ 1 تیں 2 ڈگری سلیس کہٹ ہون غی اُمید ہے ، جس سنگ پورا خطہ مانہہ سویر غی ٹھنڈ بدہ جائے گی۔

اس غے نال ہی خبراں غو یوہ بلیٹن ختم ہوؤ۔